

# 春夜宴桃李园序

李白

夫天地者、万物之逆旅。

逆旅、客舍也。

光阴者、百代之过客。而浮生若梦、为

欢几何。古人秉烛夜游、良有以也。

古诗云、昼短苦夜长、何不秉烛游。○点夜字。

况阳春召我以烟景、

大块假我以文章。

烟景、春景也。大块、天地也。触目春景、皆天地之文章。○点春字。

会桃李之芳园、序天伦之乐事。

时园中桃李盛

开、太白与诸兄弟、共宴于其中。○是设宴本意。

群季俊秀、皆为惠连、

群季、谓诸弟也。谢灵运之弟曰惠连。○美诸弟之才。

吾人咏歌、独惭康乐。

谢灵运封康乐侯。○谦自己之才。

幽赏未已、高谈转清。开琼筵以坐花、飞羽觞而醉月。

四句、确是春夜宴桃李园。

不

有佳作、何伸雅怀、如诗不成、罚依金谷酒数。

石崇宴客于金谷园、赋诗不成者、罚三觞。○末数语、写一觞一咏之乐、与世俗浪游者迥别。

发端数语、已见潇洒风尘之外。而转落层次、语无

泛设、幽怀逸趣、辞短韵长。读之增人许多情思。